

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O DOPUNI ZAKONA O ELEKTRIČNOJ ENERGIJI U FEDERACIJI BOSNE I
HERCEGOVINE**

Sarajevo, novembar 2014. godine

PRIJEDLOG ZA DONOŠENJE ZAKONA PO HITNOM POSTUPKU

Stupanjem na snagu Zakona o prekršajima („Službene novine Federacije BiH“, broj 63/14) nastala je obaveza nadležnih organa za usklađivanje propisa, kojima se regulira visina novčanih kazni u prekršajnom postupku, u roku od šest mjeseci od dana stupanja na snagu Zakona sa visinom propisanom u odredbi člana 22. Zakona o prekršajima.

Predlažemo da se Zakon o dopuni Zakona o električnoj energiji u Federaciji Bosne i Hercegovine donese po hitnom postupku, u skladu sa članom čl. 191. i 192. Poslovnika Predstavničkog doma („Službene novine Federacije BiH“, br. 69/07 i 2/08) i čl. 186. i 187. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03 i 21/09).

**ZAKON
O DOPUNI ZAKONA O ELEKTRIČNOJ ENERGIJI U FEDERACIJI BOSNE I
HERCEGOVINE**

Član 1.

U Zakonu o električnoj energiji u Federaciji Bosne i Hercegovine ("Službene novine Federacije BiH", broj: 66/13), u članu 110. u stavu (1), ispred riječi "lice" dodaje se riječ: "fizičko".

Član 2.

Ovaj zakon stupa na snagu osmog dana od dana objavljivanja u "Službenim novinama Federacije BiH".

OBRAZLOŽENJE PRIJEDLOGA ZAKONA O DOPUNI ZAKONA O ELEKTRIČNOJ ENERGIJI U FEDERACIJI BOSNE I HERCEGOVINE

I USTAVNI OSNOV

Ustavni osnov za donošenje Zakona o dopuni Zakona o električnoj energiji u Federaciji Bosne i Hercegovine sadržan je u odredbi člana III.1. tačka f.), koji je izmijenjen amandmanima VIII, LXXXIX i CVI Ustava Federacije Bosne i Hercegovine, prema kojoj je u isključivoj nadležnosti Federacije BiH utvrđivanje energetske politike, uključujući raspodjelu između kantona, te osiguranje i održavanje potrebne infrastrukture.

II RAZLOZI ZA DOPUNOM ZAKONA

Tačkom 2. Zaključka Vlade Federacije Bosne i Hercegovine, V. broj: 1613/2014 od 03.09.2014. godine, zadužena su ministarstva u Vladi Federacije Bosne i Hercegovine da, u roku od 15 dana od dana donošenja Zaključka, izvrše analizu usklađenosti kaznenih odredbi zakona iz svoje nadležnosti sa odredbama Zakona o prekršajima ("Službene novine Federacije BiH", broj 63/14 – u daljem tekstu: Zakon), te, na osnovu izvršene analize, izrade prijedloge izmjena i dopuna navedenih zakona, i iste dostave Vladi Federacije Bosne i Hercegovine, radi upućivanja u dalju zakonodavnu proceduru.

S tim u vezi, Federalno ministarstvo energije, rudarstva i industrije je izvršilo zadatak analizu tj. analizu usklađenosti kaznenih odredbi zakona iz svoje nadležnosti sa odredbama Zakona, te konstatovalo da u Zakonu o električnoj energiji u Federaciji Bosne i Hercegovine ("Službene novine Federacije BiH", broj 66/13 – u daljem tekstu: Zakon o električnoj energiji), u članu 110. stav (1), kojim je propisana novčana kazna u iznosu od 200,00 KM do 1.500,00 KM, nije precizirano na koje se lice ta novčana kazna odnosi, budući da je, u tom članu, samo navedeno da će se kazniti „lice“ za prekršaj, a što bi moglo izazvati određene dileme prilikom kažnjavanja, kao i mišljenje o neusaglašenosti kaznenih odredbi Zakona o električnoj energiji sa Zakonom.

Upoređujući propisane prekršaje za pravno lice, iz člana 109. stav (1) Zakona o električnoj energiji, sa prekršajima koji su propisani u članu 110. stav (1) tog Zakona, kao i raspon propisanih kazni u tim članovima, očigledno je da su te kazne uglavnom identične, te se lako može zaključiti da se prekršaji propisani u članu 110. stav (1) Zakona o električnoj energiji odnose na „fizičko“ lice, a što je greškom izostavljeno.

Nakon ove dopune, sve dileme oko „lica“ na koje se novčana kazna odnosi, a samim tim i mišljenje o neusaglašenosti Zakona o električnoj energiji sa Zakonom, bit će otklonjene, budući da je raspon novčane kazne propisan za „fizičko“ lice, u članu 110. stav (1) Zakona o električnoj energiji, u rasponu koji dozvoljava član 22. Zakona.

III FINANSIJSKA SREDSTVA

Za provođenje Zakona o dopuni Zakona o električnoj energiji u Federaciji Bosne i Hercegovine nije potrebno izdvojiti posebna sredstva u budžetu Federacije Bosne i Hercegovine.

